



ՀՈԳԵՎՈՐ ԾԵՄԱՐԱՆԻ 1971—1972 ՈՒՍՈՒՄՆԱԿԱՆ ՏԱՐՎԱ ՎԵՐԱԲԱՑՈՒՄԸ

Սեպտեմբերը սովորաբար Մայր Աթոռի հոգևոր ճեմարանի վերաբացման ամիսն է: Սեպտեմբերի 6-ին, առափոյան ժամը 16-ին, Վեհափառ Հայրապետը բարեհաճում է Վեհարանում ընդունել ճեմարանի 1971—1972 ուսումնական տարվա դասախոսական կազմին՝ գլխավորությամբ տեսուչ տ. Հովհաննես քին. Մարտիլանի: Վեհափառ Հայրապետը ուրախությամբ ողջունում է նոր ուսումնական տարվա բացումը և հաջողություն մաղթում դասախոսական կազմին, նույն նվիրումով առաջ տանելու ուսումնադաստիարակչական աշխատանքները հոգևոր ճեմարանի հարկի տակ:

Վերջում դասախոսները հյուրասիրվում են Մայր Աթոռի մրգերով:

Նույն օրը, առափոյան ժամը 11-ին, հոգևոր ճեմարանում տեսչի գլխավորությամբ գումարվում է այս ուսումնական տարվա առաջին մանկավարժական ժողովը, որի ընթացքում դասախոսները ծանոթանում են այս տարվա ուսումնական ծրագրերին, իրենց առարկաների, ուսումնական ծրագրի և դասաժամերի հետ:

Սույն ուսումնական տարում Վեհափառ Հայրապետի կարգադրությամբ և թելադրանքով փոփոխություն է տեղի ունենում ճեմարանի դասախոսական կազմում. անգլերեն լեզվի նոր դասախոս է հրավիրվում

Սարգիս Ինեջյանը, որուսաց լեզվի դասախոս՝ Խաչատուր Ներսիսյանը, իսկ հայոց եկեղեցական երաժշտության և խազագրության դասերը հանձնվում են Արարատ սրկ. Գալստյանին:

Փոփոխություն է տեղի ունենում նաև ճեմարանի դաստիարակների կազմում: Նոր դաստիարակներ են նշանակվում այս տարվա շրջանավարտ սարկավագներ Կորիմ Ներսիսյանը, Ժիրայր Սիմոնյանը և Տրդատ Ծամկյանը, որոնք նախկին ավագ դաստիարակ Բարսեղ Թաշնյանի հետ կկատարեն հոգևոր ճեմարանից ներս դաստիարակի պատասխանատու պաշտոնը:

Բարեշնորհ Կորիմ և Ժիրայր սարկավագ դաստիարակները առաջին և երկրորդ դասարաններում կդասավանդեն Հին և Նոր Ուխտի պատմություն:

Վեհափառ Հայրապետի հրամանով հոգևոր ճեմարանի տեսուչ է նշանակվում արժանապատիվ տ. Հովհաննես քին. Մարտիլանը, որը երկար տարիների աշխատանքային-դաստիարակչական փորձ ունի հոգևոր ճեմարանի կրթական հարկի ներքո, և նրա նվիրյալ աշխատանքը միշտ էլ գնահատվել է ազգիս Հայրապետի կողմից:

Ճեմարանի դասախոսական կազմը բաղկանում է հոգևորական և աշխարհական 22 անձերից:

Դասախոսական կազմին գլխավորում է Վեհափառ Հայրապետը, որը դասախոսելու է տրամաբանության առարկան:

Կրոնական և եկեղեցական առարկաների դասավանդությունը ստանձնել են տ. Հայկազուն արքեպ. Աբրահամյանը, ուխտավորաբար Մայր Աթոռում գտնվող Երուսաղեմի միաբան տ. Ադան արեղա Բալիոզյանը, տ. Գևորգ վրդ. Սերայդարյանը և տեսուչը:

Սեպտեմբերի 10-ին, ուրբաթ օրը, առավոտյան ժամը 10-ին, հոգևոր ճեմարանի դահլիճում, Վեհափառ Հայրապետի բարձր նախագահությամբ, կատարվում է ճեմարանի 1971—1972 ուսումնական տարվա վերաբացման հանդիսությունը:

Որոշյալ ժամին Վեհափառ Հայրապետը, շրջապատված տ. Հայկազուն և տ. Հուսիկ սրբազաններով, ծափերի ներքո մուտք է գործում դահլիճ: Ողջ ներկաները հոտնկայս ունկնդրում են Հայաստանի պետական հիմնը, որից հետո ճեմարանի երգչախումբը կատարում է «Աշակերտք Քրիստոսի» շարականը:

Հոգևոր ճեմարանի դասախոս տ. Գևորգ վրդ. Սերայդարյանը ընթերցում է Մատթեոսի ավետարանից սերմնացանի առակը:

Այնուհետև ճեմարանի տեսուչ տ. Հովհաննես քհն. Մարությանը ողջ դասախոսական կազմի անունից վստահեցնում է Վեհափառ Հայրապետին, որ այս ուսումնական տարում ևս նրանք իրենց մտավոր և հոգևոր կարողությունները ի սպաս կդնեն՝ ուսանողությանը խոր գիտելիքներ և հոգեվոր-բարոյական և հայրենասիրական դաս-

տիարակություն ջամբելու համար: Իր խոսքի վերջում տեսուչը խնդրում է Վեհափառ Հայրապետին, որ Նա այս սուրբ գործի նախօրեին տա Իր օրհնությունը ուսանողությանը և դասախոսներին:

Ապա խոսք է առնում Վեհափառ Հայրապետը և մի շարք օգտակար խորհուրդներ ու խրատներ տալիս ուսանողությանը, ներանց պատվիրում է լինել աշխատասեր, կարգապահ, մեծ սեր ունենալ դեպի մեր դարավոր ազգային մշակույթը և յուրացնել այն, ամբողջ հոգով նվիրվել համազգային այս մեծ հաստատությանը:

Ապա Վեհափառ Հայրապետը օրհնում է դասախոսական կազմին և ուսանողությանը, մտղթում նրանց նորանոր հաջողություններ:

Այնուհետև դասախոսական կազմը և ողջ ուսանողությունը մոտենում են Վեհափառ Հայրապետին և համբուրում Նրա ս. Աջը: Հանդիսությունը վերջանում է Վեհափառ Հայրապետի «Պահպանիչ»-ով և խմբովին երգված «Հայր մեր»-ով:

Այս տարի հոգևոր ճեմարանն ունի 36 ուսանողներ՝ բաժանված հետևյալ դասարանների և լսարանների վրա.

Ա. դասարան՝ 10

Բ. դասարան՝ 6

Գ. դասարան՝ 7

Ա. լսարան՝ 8

Բ. լսարան՝ 5:

Սեպտեմբերի 11-ին, ուրբաթ օրը, ճեմարանի հարկի տակ հնչում է նոր ուսումնական տարվա առաջին զանգը:

